


STEELBAND

Parti di Aruba su carnaval



E promé steelband cu a wordo lantá aki na Aruba ta Aruba Invaders; esaki dor di Edgar Connor (q.e.p.d.)

Ora cu Edgar Connor a fayecé na 1997, a ser bisá cu su curá di cas situá na Congoweg tabata te ainda yen di drums bashí. E tabata warda subsidio di gobierno pa convertí e drumnan aki den 'steelpans' pa asina siña e generacion nobo di arubiano con pa toca e instrumentonan musical mágico aki.

Connort a un di e nombrenan grandi cu a contribuí na e historia di carnaval. E ta e fundador di un di e promé steelband y esun di mas popular, Aruba Invaders Steel Orchestra, cu el a sa di manehá hunto cu su casá Gloria, kende ta un maestra di piano.

Mas cu e cantidad di premionan y popularidad cu The Invaders Steelband y Connor a acumulá durante e era di steelband, tabata e influencia cu e steelband tabatin riba e música di carnaval en general.

E gran Roadmarch King Lord Boxoe (q.e.p.d.), compositor y arreglista Franklin Granadillo y Claudius Phillipsta algun di e lista largo di e musiconan local cu a toca nan promé tononan musical riba e steelpans di Connor.

E storia di con e 'pans' a yega Aruba awor ta un leyenda.

Entre e cantidad di imigrantenan di otro islanan den Caribe cu a bini akinan despues di e di Dos Guerra Mundial pa traha den e refineria, por a encontrá Leonard 'Shu Shu Baby' Turner, ex miembro di e famoso steelband The Invaders di Trinidad.

Emúsica melodioso cu tabata sali for di e drumnan trahá na man, cortá y mahestuosamente

batí cu martiuw den e diferente escalanan, por a ser escuchá pa promé biaha na 1945, durante e promé parada di carnaval cu a tuma lugar na San Nicolas. Pero tabata e bishita di The Invaders di Trinidad na Aruba, cu realmente a inspirá Edgar Connor, kende e tempo ey tabatin solamente 14 aña.

Edgar y su ruman Paul a pidi The Invaders pa laga e pans di manera cu nan por siña toca riba nan. The Invaders a laga esakinan, pero nan tabata kibrá, pa asina setgurá nan mes cu esakinan lo no wordo tocá na Aruba.

Esaki no a stop e rumannan Connor. Nan a hiba e pans asina mes nan cas y a traha riba nan te ora cu nan a logra convertí nan den instrumentonan un biaha mas.

"Mi tata tabata riba e caminda," asina e jiu homber di Connor, Nikko, a bisa di e amor di su tata pa e steelband. Nikko y su tres rumannan homber a crece den un curá y ená cu steelpans, y tur cuater a toca den gruponan di steelband na e mes momento.

Na e momentonan aki cada un di e jiuonan di Edgar Connor ta envolví den musica: un ta rapper, e otro ta toca sax, esun mas chikito ta drummer den Climax y Nikko ta un músico, actuando na e momentonan aki den Iguana Lounge di Royal Cabana Casino.

E música di steelband tabata e único música cu tabata wordo tocá den carnaval, na cumintamento. Hunto cu The Invaders, hopi otro steelband a wordo formá riba nos isla, y tabata atopa otro durante e temporada den un competencia. Aruba Invaders tabata invencible di 1967 te cu 1972.

Na cumintamento e steelbandnan tabata toca hitnan di Trinidad, pero despues, cu e debut di e festivalnan local di música na 1964, nan tabata toca e roadmarchnan local.

Steelband na Aruba a keda 'roadpans', ya cu versionnan mas chikito di e orkestanan di steelband y nan música tabata wordo escuchá solamente riba caya y masha poco nan tabata bin den spotlight di festival.

Hopi arubiano lo corda con e isla tabata bira loco ora cu steelbandnan pasa, den un haula cu na cumintamento tabata wordo halá pa hende hombernan, tocando cancionnan manera e hit di Miriam Makeba 'Pata Pata' of 'The Village Burning Down' e roadmarch di aña 1967 di Young Quick Silver.

Edgar Connor a grana dos L.P. cu Aruba Invaders, a biaha pa Estados Unidos y Argentina; a toca riba e barconan crucero Queen Elizabeth I y

Queen Elizabeth II y tambe den Holiday Inn Hotel.

E último biaha cu The Invaders a toca riba caya tabata na aña 1992, ora nan a wordo honra den e JUBU jump-up cu a cumintá e aña ey na San Nicolas. E último presentacion ey, riba un anochi, a yena un buraco di 15 aña den cual steelband a disparcé completamente for di carnaval di Aruba y Edgar Connor mesa perde e interes pa trece su música bek riba caya.

Despues di e steelband a bini e brassband den añanan 60, cual tambe a marca e final di e era di steelband. E brassbandnan tabata toca mas duro; e cuerdenan mas fuerte, pues e música trankil di e steelband ya no por a para banda di e demanda pa mas música di brassband. Ironicamente, den un último intento pa mantené su popularidad, a pone steelbandnan riba truck, electrificando nan sonido dor di pone un speaker, bass eléctrico y un drum, y a toca e cancion 'Du Wah Nani' di e grupo Exuma. E coro di e mesun cancion aki, cu tabata masha popular e tempo ey, a bolbe haña su caminda den e carnaval di Aruba den e cancion Huppelen. Otro ironía ta cu awor ta e brassbandnan ta sinti cu e público ta preferá e bandanan 'live' y speakerman.

Ta danki na un grupo chikito di arubiano con cu ta stima steelband, cu steelband de bes en cuando ta presentá den e Aruba su carnaval.

Un di e musiconan di mas jong cu a yega di toca steelband ta Francis Jacobs, actualmente PR di Aruba Tourism Authority. Francis a cumintá toca steelband tempo cu e tabatin cinco aña y a haci su aparicion pa promé biaha den Tanki Flip Steel Band na aña 1968. E ta un di e musiconan hoben cu tambe a pasa den e curá di Connor, sperando pa nan caba cu e drumnan. Jacobs tabata cu Young Stars Steel Band, dirigi pa su tata Max Jacobs te cu aña 1990. E banda aki a biaha hopi pa exterior y a presentá na Venezuela, Colombia y Merca.

Jacob ta kere cu, aunke steelband na Aruba no a desarroya un estilo di su mes, manera ta e caso cu brassband y e ritmo asambheho, nan a toca música cu ta mas varia cu por ehempel e steelband di Trinidad.

"Steelband arubiano portoca tur música local, di tumba te cu calipso, reggae y wals, merengue y roadmarch, incluyendo clásico, mientras cu steelbandnan di Trinidad ta toca solamente calipso, reggae y clásico," Jacobs a bisa. E ta kere mester continuá cu e local Edgar Connor y Buchi Boekhoudt, otro amante di steelband na Paradera y lider di Aruba Lovers Steelband, a cumintá.

Personalmente Jacobs lo percurá pa e música di steelband continuá den e carnaval di Aruba pasobra "mi kier mostra e hubentud cu steelband por haci su regreso den e carnaval di Aruba".

